

中国荒政书集成

第八册



国家清史编纂委员会·文献丛刊


国家清史编纂委员会·文献丛刊

中国荒政书集成

第八册

主 编 李文海

夏明方
朱 泚

 天津古籍出版社

本书被列为国家古籍整理出版“十五”重点规划

本书出版得到国家古籍整理出版专项经费资助

高等学校全国优秀博士学位论文作者专项资金资助项目

教育部人文社会科学重点研究基地重大项目清代灾荒研究

中国人民大学“十五”“二一一工程”清史子项目



救濟災黎陪賑散

清光緒四年刻本

(清) 陳良佐 撰

趙曉華 點校

国家清史编纂委员会出版编委会

(按姓氏笔画排序)

马大正 于沛 朱诚如

成崇德 李文海 陈桦

邹爱莲 孟超 徐兆仁

戴逸

救济灾黎陪赈散

弁 言

《陪赈散》一书由来久矣。盖大饥之后，必有大疫。人当冻馁之余，受症最易。一交春令，往往随气而发。去年冬秦、晋、豫三省奇荒，流民至皖者，吾颍尤多。余与当事诸公筹所以施济之，倡义集货，设赈厂，设粥店，随地拯救，不遗余力。然嗷嗷哀鸿，有不死于饥而复死于疫者。群居杂处之区，传染尤速。治法未善，猝不待时。余目睹死亡，正忧无术挽救，适友人授此书，展阅一过，见其立论命名之意，若专为此时而设者。因亟付梓，广布流传，起沟中之瘠，活涸辙之鱼，俾垂死灾氓生还乡井，岂非大幸也夫！

光緒四年歲次戊寅仲春月颍川程文炳謹識

热疫病原

夫热疫之病，皆因岁歉久困，饥寒所致也。久困于饥，则脾胃受伤而邪火上炎；久困于寒，则冷彻骨髓而肺肾受伤。肺伤则气衰，肾伤则水涸。饥寒伐其体，贫苦乱其心，烦恼百出，以伤其肝。是五脏之邪火为害，发而移热于六腑，一时不能畅达，凝郁蓄久而成热毒。此热疫之源也。每年自交春分，天气渐热，疫毒渐炽；一交秋分，天气乍凉，疫毒得凉即解。是热毒皆乘天时而发越，因名时疫。然亦有饱暖而其体虚者，每得自传染，故曰流行，又曰天行。非天之欲行此疫也，乃热病乘天之热而行耳。盖其见症多端，各随其亏损之所尤甚者而为之发于其经也。治法宜以祛风散火、清热解毒为要。佐窃谓热疫由于风木太过，克制脾土，气不运化，邪火自生，热毒郁结，壅塞于上中二焦，停滞于肠胃曲折之处，随生疫病，见症多端，非寻常药品所能治也。宜以陪赈散主之。至其病状，详细说明，以便识认，庶无遗漏之弊。谨将诸症开列于左：

有头晕、浑身壮热、内烧、呕哕吐食者；

有头眩、胸膈不利、不思饮食、遍身壮热膨闷者；

有浑身大热、饮食无度者；

有内热作渴而身不发热者；

有浑身壮热而无汗者；

有浑身壮热而自汗无度者；

有头痛脑闷、壮热发渴、遍身骨节疼痛者；

有壮热发斑者；

有壮热、瘟疫发疹者；

有头面猝肿者；

有咽喉肿疼、痰涎壅塞、滴水不能下者；（遇此等急症，宜用马齿苋二斤，不见水捣烂，入白麦面

半斤、陈醋一两和匀，敷肿处，便觉冰凉爽快。口中含陪赈散，即能润下。半日之间，咽喉之肿尽消如失。）

有咽喉疼痛、上连腮腭、痰涎上壅者；

有浑身壮热、声音不亮者；

有猝然跌倒、喉中痰响如水鸡声者；（切勿认作真中风、类中风等症。）

有浑身壮热、头昏而聋者；

有头顶猝然肿大如斗者；（俗名大头瘟，服陪赈散尤妙，或服普济消毒饮亦可。）

有遍身斑疹杂出者；

有遍身似瘾疹、似风疮者；

有丹毒遍身似火烧者；（此症皮肤血热，小儿尤多。外以枣刺或绣针微于四围少点出血，即以韭菜、地曲、蟾尿、凉水敷。）

有血从口中出者；

有血从鼻中出者；

有血从牙宣中出者；

有血从大小便出者；

有小便热淋如血者；

有小便涩痛不通者；

有大便闭结者；

有泄泻无度者；

有腹中作痛、肠鸣如雷者；

有舌强、口苦、咽干、声音不亮者；

有身热内烧、口舌生疮者；

有谵语发狂、昏迷不省人事者；

有见神见鬼、手舞足蹈、颠狂似疯者；

有患热疫，误服发汗之药，变为亡阳之症而发狂叫跳或昏迷不知人事者；

有昏不知人、如醉如痴者；

有发热头疼、咳嗽不安者；

有病愈后任意饮食而其病复发者；

有病愈后不戒房劳而其病复发者；

有因恼怒而其病复发者。

以上诸症，皆热疫也。并宜以陪赈散主之。若但减其热而热犹未尽除，宜再服。若热已尽除，不必再服矣。

陪 赈 散

白僵蚕（伍斤黄酒拌炒）、净蝉退（二斤半）、嫩姜黄（十二两）、川大黄（十斤）

右四味各自为末，共合一处和匀。每服一钱八分二厘五毫，用生蜜、冷黄酒各五钱调服。服后须忌口半日，不可吃烟，亦不可吃饭食、饮茶酒等物，不过半日全愈。若不忌口，药不效矣。然此药宜空心服，若饱食后服之，亦不见效。

愈后禁忌：饱食、荤酒、气恼、房事。

贫人患热疫，或一二日或月余未愈者，但服此药一服，愈矣。以其未曾误服他药故也。若有力之家服之，愈者亦有六七，其不愈者亦有二三，以其误用他药故也。

此方专治三十六般热疫。春分以后、秋分以前，但有乍病者，服此俱有大效。若秋分以后及未交春分以前诸症，俱不可服，切须忌之，因其时令不同故也。譬如纱葛为当暑之服，裘绵为御冬之衣物，各因时不容混乱，况药品独无冬夏之分乎？惜前人未曾道破，今佐以一言蔽之曰：每岁自春分以后、秋分以前所得疫症，皆不可解肌发汗。若误汗之，则亢阳之火愈炽而病愈危矣。

陪赈散命名之意

佐因岁饥有赈，凡赈济之所，不可无此药以陪之，故曰陪赈散。此方群书不载，亦非师传，佐以天下后世生民之性命为重，是以日不暇食，夜不暇寝，半生心力尽瘁于此，从一隅三反而得其旨趣，由触类旁通而得其要归，自阅历以造于精微，屡经验而知其神妙，非敢曰自裁，实独撰之方也。此药计重一钱八分二厘五毫，下咽即苏，半日全愈，全活者不可胜记。诚卫世之仙丹，保民之至宝，不可视为泛常而忽之也。每自春分以后、秋分以前一百八十二日之间，但有乍病者，此药俱可服之。若一交秋分以后及未交春分以前，即有疫病，此药俱不可服。须知立方之旨，专在热疫起见也。至于寒疫，古人之论详矣，奚庸多赘？若谬以治寒疫之古方而治今人之热疫，则热疫之人奚罪焉？此陪赈散之所由著也。且观古今之医书，非不有时疫瘟疫之条，然皆编入伤寒部中。其所论之言，无非寒疫，实乃治伤寒病之方也。佐窃谓此等方法但治寒疫未尝不效，若误治春分以后之热疫，是所谓身处水火而益之以深烈也，可不慎欤！

藏器云：俗工虽有疗病之名，而终无必愈之效。尝自文其过曰：王道无近功。若闻捷效之方，心怀忌刻，反诬之曰，此霸道也，我辈不用。佐窃谓热疫之病，杀人甚速，苟非捷效，济其何事？

张子和云：良工先治其实，后治其虚；粗工或治实，或治虚；谬工则实实虚虚；惟庸工则误其虚，不敢治其实。举世不省其误，故表而出之。夫病非人身素有之物，或从外人，或自内出，皆邪气也。邪气中人，去之可也，留之未有不为害者。佐窃谓去邪正所以治病，病去而元气复矣。经曰：知其要者，一言而终。此之谓也。

药性总论

夫立方必有君臣佐使，而又兼引导，此良医之法也。陪赈散以僵蚕为君，蝉蜕为臣，姜黄为佐，大黄为使，米酒为引，蜂蜜为导，六法俱备而方成矣。尝考《本草》而知蚕之气微温，味微辛，为清化之品，故能升阳中之阳。清阳之气既升，而阴浊之气自降，则邪火自散，邪热自除，烦燥自解，而口自不渴矣。夫蚕食而不饮，必三眠而三起，二十七日而老。眠者病也，故合箔皆病而不食也；起者愈也，故合箔皆起而食也；僵则合箔皆僵。用此而治合家之热疫，所谓因其气相感而以意使之也。故以为君。夫蝉气〔蜕〕无毒，味咸而甘，为清虚之品，吸风饮露，得清阳之真气，所以能祛风而除湿，得太阴之精华，所以能涤热而解毒也。以清虚之品而治饥饿乏食之病，亦所谓因其气相感而以意使之也。蜕

者，退也。欲使病退，亦如蝉之脱然无恙也。故以为臣。姜黄，气味辛苦，大寒无毒，蛮人常生啖之，喜其祛邪伐恶，解热消毒，能入心脾二经。治疫故以为佐。大黄，苦寒无毒，亢阳之甚，非此莫抑。寒能泻火，苦能补虚，一举而两得之。人但见其建良将之功勋，而不知其有贤相之硕德也。故以为使。米酒，其性大热，其味辛苦，而甘能上行头面，遍达周身，内通十二经络，外溢肌肤毛窍，驱逐邪祟，无处不到。今以冷用则不过猛，一杯则不过多，渐渐行之，引药四达，自能调养血气。故以为引。蜂蜜，甘平无毒，生则性凉，能清热润燥，导疫毒下行，故以为导。蚕以清化而升阳，故能祛风靖疫；蝉以清虚而散火，故能涤热解毒。君圣臣贤，治化出焉。姜黄伐恶而建功，大黄勘乱而致治，佐使同心，功绩建焉。酒引之使上行，蜜润之使下导，引导协力则疫毒自除，而身心自泰矣。此方补泻兼行，无偏胜之弊；寒热并用，得中和之妙，故其效甚速而其验自神也。其药每服用一钱八分二厘五毫者，乃上法天时也。自春分至秋分，计一百八十二日半，一日一度，得周天一百八十二度半。语当细审，意须默会，神而明之，存乎其人。果知其妙，造化之机操之自我，然血肉之驱虽不免染受热疫，而斡旋得法，又何患群黎之困于天时耶？语云：人定胜天。其洵然哉！

热疫禁忌药味

凡治伤寒热病、发表取汗之药，一概禁用。今但摘其所尤者，表而出之。歌曰：麻黄羌独活，菖浦细辛葛。香附艾苍耳，桂枝牙皂角。巴豆大犯忌，川椒乌梅合。以上十四味，用之不能活。

附录陈良佐治热疫各方

大复苏饮子

治热疫 神昏不语、目赤口干、形如醉人，或谵语跳骂、哭笑不时、不辨亲疏、目不能闭者，名越经症；若误服发表而然者，名亡阳症。

黄连（一钱） 黄芩（一钱） 犀角（一钱） 梔子（一钱） 滑石（一钱） 麦冬（一钱）
 人参（一钱） 甘草（三分） 茯神（一钱） 天麻（一钱） 当归（三钱） 生地（二钱）
 丹皮（一钱） 僵蚕（二钱） 蝉蜕（一钱）

右锉一剂，水煎去渣，微温，入生蜜、冷黄酒□□杯服。来章曰：热入于心经，凉之以黄连、犀角、梔子；心移热于小肠，泻之（以）滑石、甘草；心热上逼于肺，清之以黄芩、麦冬。然邪热越经而传于心与肝，多亡阳者，皆心神不足故也，故加参神以补之。佐窃谓应用天麻以定其搐，使之开窍，再用归地、丹皮活血凉血，以养其阴，仍用蝉蜕以治其疫方妥。

小复苏饮子

老府门前裴玉书，年三十余岁。四月间患时疫，已经半月，危甚。因服发汗解表之药，发狂谵语，昏迷不省人事，浑身壮热，大便燥结。佐制此方，一服竟愈。隔两日，其

病复作，微有谵语。余曰：此因饱食而然也。仍以前方服之，果安。又两日，彼遇他医，谬为改方，服之立即狂跳谵语尤甚。佐仍用前方，即时而愈。

黄连（一钱） 黄芩（一钱炒） 黄柏（一钱） 知母（一钱） 桔梗（一钱） 丹皮（一钱）
黑栀（一钱） 神曲（三钱炒） 车前（二钱） 生地（二钱） 木通（二钱） 僵蚕（三钱炒）
蝉腿（十个）

引同上，加自己小便一杯服。

大清凉涤疫散

治热疫 浑身发热，胁痛耳聋，咽干口苦，自汗，口臭出血，或谵语发狂。

胆草 黄芩炒 栀子 泽泻 木通 车前 五味 天冬 麦冬 黄连 泽兰 知母
银花（以上各一钱） 当归 生地 僵蚕 蝉腿（以上各二钱） 全蝎（三个） 甘草（三分）
引同上，不加小便。

此方用胆草、黄芩泻肝肺热，栀子清三焦，泽泻、知母以泻肾，木通、车前泻热于下，当归、生地、甘草养阴和中，天冬、麦冬、五味敛肝、润燥、养筋，黄连泻心，泽兰行气消毒，银花清热解毒，蝉蜕为治疫要药，全蝎去风定搐。

代天靖疫饮子第一方

治热疫 浑身大热憎寒，体重，头面猝肿，目不能开，上气喘急，口干舌燥，咽喉不利。

黄连 黄芩 元参 连翘 桔梗 胆草（以上各一钱） 橘红（三分） 甘草（三分） 僵蚕（三钱炒） 蝉腿（五个） 银花（二钱） 泽兰（二钱） 白附子（五分）

引同上。

此方用芩连泻心肺之热，胆草泻肝胆之热，元参、橘红、甘草泻心补中，泽兰行气消热，银花清热解毒，连翘去心经之客热，白附去头面之风毒，蚕蝉散毒消肿，定喘出音，能使清阳上升，桔梗为舟楫载药，不令下行也。

代天靖疫饮子第二方

一人四月间患时疫，因著恼发热头痛，遍身支节疼痛，误发汗，愈加沉重。佐制此方，一服而瘟疹发现，四服全愈。

黄连 黄芩 黄柏 骨皮 车前 丹皮 木通（以上各一钱） 神曲（三钱） 当归（二钱） 桔梗（二钱） 陈皮（六分） 僵蚕（二钱） 蝉腿（十个）

代天靖疫饮子第三方

一人四月间患时疫，因误服防风、通圣散及葛根汤、小柴胡发汗等药，延至半月，病势甚危，浑身大热，谵语目赤，手足搐搦。佐制此方，两服愈。

黄连（一钱） 黄芩（一钱） 桔梗（一钱） 红花（一钱） 车前（一钱） 丹皮（二钱）
生地（二钱） 木通（二钱） 当归（三钱） 神曲（三钱） 僵蚕（三钱） 蝉腿（十个）

引同上，加自己小便一杯。

小清凉涤疫散

治热疫 浑身发热，内有积热，烦燥头沉，满面发肿或唇口颌腮肿者。

黄连 生地 丹皮 石膏 紫草（以上各一钱） 当归 银花 泽兰（各二钱） 僵蚕（三钱） 蝉蜕（十个）

此方黄连泻心脾之火，石膏泻阳明之火，紫草通窍、解毒、消肿，泽兰行气，银花消毒清热，当归、生地、丹皮凉血养阴而退阳也。蝉蚕为清化之品，清升则热解肿消，而病自止矣。

宁心驱疫饮子第一方

治热 疫初觉浑身发热憎寒，体重，四肢无力，遍身酸疼，口苦咽干，胸膈膨闷。佐制此方，无发表药而汗液流通，无攻里药而疫毒自下，有斑疹即现而内症悉除。

黄连（一钱） 木通（一钱） 车前（一钱） 桔梗（一钱） 僵蚕（一钱） 黄芩（五分炒）
黄柏（五分） 神曲（二钱） 生地（二钱） 银花（二钱） 蝉蜕（一钱）

引同上

宁心驱疫饮子第二方

黄连（一钱） 僵蚕（一钱） 白附子（一钱） 丹皮（一钱） 车前（一钱） 木通（一钱）
桔梗（一钱） 生地（二钱） 神曲（三钱） 当归（二钱） 陈皮（六分） 甘草（五分）
蝉蜕（十个）

引同上，加小便一杯。

宁心驱疫饮子第三方

一人五十一岁，于四月患时疫，憎寒壮热，头晕，口干，作呕，四肢无力。佐制此方，一服全愈。

川连（一钱） 红花（一钱） 当归（二钱） 生地（二钱） 丹皮（三钱） 生芪（二钱）
泽兰（二钱） 黄芩（二钱） 桔梗（二钱） 神曲（三钱） 僵蚕（三钱炒） 蝉蜕（五个）
甘草（三分）

引同上。

一妇人五十一岁，腹中受孕已五月余。四月患时疫，心中作热，身外却凉，头疼发呕，病势甚危。佐亦用此方，一服全愈。盖僵蚕蝉蜕，孕妇禁用，而服之并不动胎气，所谓有病病受也。故附记之。

书中始终并不言及气运，亦不言及脉诀，诚恐愚夫愚妇未晓其义，反生疑惑，故不必细言。然大义无不总括，是在善用者而消息之。



救 灾 福 报

民国二十四年刻本

(清)郑官应 辑

赵晓华 点校

序

阴鹭之说，士大夫所不言。非不言也，本此恻隐羞恶之心，为利物济人之举，亦行其心之所安而已，岂有所为而为哉？然而天道好还，不求福而福自至，不望报而报愈彰。征诸往事，历历不爽，特人自不察耳。自欧风东渐，异说朋兴，学者不探性命之原，不究循环之理，举先贤往哲劝善之书，不斥为妄谈，即嗤为迷信，相随相激，而人心日趋于凉薄，风俗日即于浇漓，驯至酿成弥天浩劫而不悟，此有心人所为惴惴焉若不可终日者。丹徒吴养臣世伯乐善不倦，见义勇为，得香山郑陶斋先生《救灾福报》一书，视为劝善鸿宝，一再印行，俾资观感，其成效固已数数见矣。今复以各省水灾为患方烈，更出是书，广为印送。观其用心之苦，设计之周，与人为善之念，肫诚而迫切，岂寻常号称善人者比哉？宜乎潞国精神、汾阳福泽，悉萃于一身，而福报之来，且绵绵而不绝也。读是书者，其亦知所感发也夫！

民国二十四年岁次乙亥冬至日淮山朱邦伟谨识

老友吴养臣先生深于情，笃于义，曩见所刊陶斋《救灾福报》一书，知其与人为善之心沛然莫御。书凡三刻，自前清光绪戊子、丙午，迄宣统辛亥，水患频仍，赈款立集，皆是书之刻有以致之。洎乎共和肇始，兵燹未终，各省亦灾侵见告。养澄复以是书梓而行之，俾览者慈祥恺悌之念油然而生，于拯患救灾之举或有补助。是养澄之志也夫！

民国二年冬十二月蒲番昌识于上海木石居

《救灾福报》一书，郑陶斋先生见前人凡存心施赈者，子孙必获福报，因辑刊以赠同人。兆元于戊子、丙午一再刊布，兴起者颇众。人之好善，谁不如我？此书之有功于赈务也，实非浅鲜。今年长江一带，自湘、鄂、皖、苏以达浙境，水势泛滥，淹没田庐十者而九，哀鸿遍野，较之戊子、丙午灾情尤重。爰覆刊印，遍送仁人君子阅之。或解囊，或劝募，积腋成裘，捐输必因之大集，而子孙之获报更可卜操券而得矣。

宣统辛亥秋七月丹徒吴兆元养臣氏谨识

《救灾福报》一书，为香山郑陶斋部郎劝赈时所辑，久已脍炙人口。自光绪戊子年郑州水患，豫皖告灾，满目疮痍，延颈待命。丹徒吴观察养臣时在上海，重刊是书，以为世劝。果见仗义诸君子捐输惟恐不速，解助无时或吝，是以积腋成裘，共襄善举者，未始非是书之有感遂通也。今又值湖南、江西、江南等处水灾告变，区域之广，无殊郑豫。时适吴观察辙息蜀东，叹人生之迁徙靡常，感今昔之灾害并至。一感触，偶检行篋，得是书。属朝宗读之，果足激发善心，为劝赈之左券。爰商朝宗所创用聚珍版，排印数千部，分送同人。有心世道者，谅亦乐为资助也。

光绪丙午八月渝北后学杨朝宗谨识

《救灾报福》一书，我友郑香山劝赈时所辑，阅今十年矣。比值郑州决口，豫皖告灾，南中诸君子体视民如伤之隐，廛铤而走险之忧，仗义疏财，惟恐不及。然灾区太广，赈资有穷，识者忧之。丹徒吴君养臣因重刊是书，以为世劝，诚保民报国之盛心也。至于救灾恤邻，行道有福，书中详言之，无待赘述。

光绪戊子春二月吴县谢家福识

乐善不倦，天爵也。顾有无所为而为之者，有有所为而为之者。无所为而为之，可以希圣贤而不可例常人。三代以下，常人行善，虽圣人不苟求也。孔子曰：善人吾不得而见，得见有恒者，斯可矣。何善人之与有恒相去乃若是哉！诚难乎其不倦也。香山郑陶斋正郎辑《救灾福报》一册，大率记汉初迄国朝诸人氏修德而获报者。其中大小远近虽各殊，而善之在赈荒者功尤大而报尤隆。名曰福报，固知修天爵以要人爵，有本者皆如是。由流溯源，其涂极远。使持此不倦之心，积久行之，则自有恒以驯致乎善人，君子无难也。黄河滥觞宿海，自积石龙而下，沛乎汇江汉以入海，而蓬壶金阙，其富若贵，且有非人间所能仿佛者，岂非源远流长哉？谨书数行以志钦慕云。

光绪四年六月望日余杭褚成宪识于上海

古今四大部洲世家巨族，富贵绵延，无不由祖先之阴德以致。代有伟人，而阴德之最大、报应之最速者，莫如荒年施赈，一举可活千万人，上契天心，下全民命。古云活千人者后必昌，洵不诬也。考诸记载，有因活饥民而及身富贵者，有因活饥民而克登上寿者，有因活饥民而子孙科甲累代簪缨者，自古及今不可胜数。盖德愈积，福愈大，不求果报，不求人知，天之报施愈觉其丝毫不爽。爰选录救灾福报数十则，皆确有可据，请沈小园中翰鉴定，名曰《救灾福报》，俾资观感。当此直豫秦晋数百年来未有之奇灾，正祸福消长之秋，国家发帑截漕，士庶捐资助赈，皆趁此机缘耳。印既成，遂书数言以为之劝。

戊寅六月香山郑官应谨序

救灾福报目录

官吏（细目略，下同）	(5255)
绅富	(5263)
士庶	(5268)
妇女	(5274)
方外	(5275)